

„SIMBOL POVEZANOSTI ISTOKA I ZAPADA“

**Obraćanje Alije Izetbegovića na svečanosti povodom početka obnove Starog mosta -
Mostar, 29.09.1997. godine**

„Dame i gospodo,

dragi građani Mostara,

dragi prijatelji, svi vi koji ste došli iz bliskog susjedstva ili iz dalekog svijeta, pozdravljam vas!

Govorit ću kratko jer sam, kao i vi, veoma uzbuđen.

Prije svega hoću da vas sve pozdravim i da vam zahvalim što ste došli da uveličate ovu našu zajedničku svečanost. Jer ovo nije samo praznik Mostara, niti samo Bosne i Hercegovine. Ovo je veliki trenutak za sve ljude kojima je civilizacija na srcu.

Od kada nam je u ono hladno novembarsko jutro, prije skoro četiri godine, stigla nemoguća, nevjerovatna vijest da je ubijen Stari most – kažem ubijen, jer je ovaj neuporedivi spomenik imao dušu – počeli smo da sanjamo današnji dan. Vjerovali smo da će on doći jer smo vjerovali u Bosnu. Ali, da budem iskren, ni u najsmjelijem snu nismo mogli pomisliti da će na tom plemenitom poslu sa nama biti toliko ljudi iz cijelog svijeta.

Očito, svi smo mi dobro razumjeli – i oni koji su onda rušili Stari most, i mi koji ga danas obnavljamo, da se radi o velikom simbolu povezanosti, ne samo između ljudi i naroda Bosne i Hercegovine, nego i između dva svijeta: Istoka i Zapada.

Zato hvala svima koji ste danas sa nama na ovom prazniku civilizacije, na ovoj zajedničkoj molitvi – da je tako nazovem – za bolje i plemenitije sutra. Posebno hvala španskim i mađarskim prijateljima koji su toliko učinili da početak ovog plemenitog posla bude moguć.

Vi na najbolji način demantirate neljudsku doktrinu o neizbježnom sukobu civilizacija, tu lažnu nauku koja se već koristi da bi se opravdala sva barbarstva, prošla, sadašnja i buduća. Naprotiv, vaše učešće i trud vrlo zorno svjedoče da je ljudska solidarnost jača od zla i da će dobro, ako budemo radili zajedno, trijumfirati.

U tome je veličina današnjeg dana.

Čestitam vam naš zajednički praznik.

Hvala i živjeli!“